



**Hönnunarkeppni í samstarfi við
Hönnunarmiðstöð Íslands**



Um hönnunarkeppnir

Í hönnunarsamkeppni berast margar góðar tillögur, þær virkja faghópa til þátttöku, skapa umræður og vekja athygli á verkefninu og skipuleggjanda keppni. Það er mikilvægt að verkefnið sé mjög vel skilgreint og markmið skýr. Góð keppnislýsing leiðir til betri niðurstöðu og fleiri innsendinga, enda geta skipuleggjandi keppni og þátttakendur ekki skipst beint á skoðunum um hugmyndir og markmið eins og þegar leitað er til ákveðins hönnuðar eða hönnuða. Fjöldi keppenda og hæfni fer eftir aðstæðum á hverjum tíma, þema keppinnar og ekki síst verðlaununum sem í boði eru. Þó því fylgi kostnaður og vinna að skipuleggja og halda hönnunarsamkeppni, er afraksturinn yfirleitt mjög góður þegar vel er að verki staðið.

Þegar hönnunarkeppni er haldin, er gott að hafa í huga nokkur mikilvæg atriði:

Vegleg verðlaun

Vel skipulögð keppni með góðum verðlaunum getur laðað fjölmarga til þátttöku. Margir hönnuðir leggja mikla vinnu í verkefnið en aðeins örfáir hljóta verðlaun, þess vegna þurfa verðlaun að vera vegleg og hærri en venjuleg þóknun. Verðlaunafé er einungis greiðsla fyrir verðlaunatillögu. Þóknun fyrir notkunarrétt á tillögunni, eða frekari vinnsla hennar er ekki innifalin í auglýstu verðlaunafé. Hönnunarkeppni á ekki að vera hagkvæm leið til að fá fjölbreytta vinnu frá hönnuðum.

Hæf dómnefnd

Til að metnaðarfullir hönnuðir taki þátt í keppni er skilyrði að tillögur séu dæmdar af faglegri dómnefnd. Meirihluti dómnefndarmanna verða að vera hönnuðir tilnefndir af Hönnunarmiðstöð Íslands og þá þarf að nafngreina þegar boðið er til keppni.

Rúmur skilafrestur

Hönnuðir vinna tillögur fyrir keppni samhliða öðrum verkefnum og oft utan venjulegs vinnutíma. Hönnunarverkefni krefst tíma til að safna gögnum, gera tilraunir og ekki síst til sjálfrar hönnunarinnar. Rúmur skilafrestur tryggir vandaðri vinnubrögð, sterkari tillögur og betri árangur.

Nafnleynd

Til að tryggj sé að innsend verk í keppni verði dæmd af hlutleysi, og gæði hugmynda og útfærslu skipti ein máli við matið, má dómnefnd ekki vera kunnugt um nafn hönnuðarins.



Keppnisreglur Hönnunarmiðstöðvar Íslands

fyrir fyrirtæki, samtök, opinberar stofnanir og aðra sem hyggjast standa fyrir hönnunarkeppni.

Samstarf við Hönnunarmiðstöð um hönnunarkeppni tryggir fagmennsku, gæði og þátttöku íslenskra hönnuða.

Opin keppni | er öllum opin

Opin keppni fyrir hönnuði | er fyrir hönnuði sem eru félagsmenn í félögunum níu sem eiga Hönnunarmiðstöð Íslands eða hönnuði einstakra félöga innan Hönnunarmiðstöðvar

Lokuð keppni | í lokaðri keppni eru nokkrir hönnuðir valdir til þátttöku og allir fá greitt

Hver gerir hvað?

Hönnunarmiðstöð Íslands

1. Leggur fram reglur og umgjörð keppinnar og veitir ráðgjöf varðandi framkvæmd
2. Sér um að tilnefna meirihluta dómnefndar
3. Sér um að tilnefna keppnisritara í samráði við skipuleggjanda keppni
4. Kynnir keppnina meðal félagsmanna, aðildarfélaga sinna með öllum tiltækum leiðum og hvetur til þátttöku.

Skipuleggjandi keppni

1. Leggur fram verklýsingu í samráði við Hönnunarmiðstöð
2. Sér um að tilnefna minnihluta dómnefndar
3. Leggur til verðlaunaféð og stendur straum af kostnaði við framkvæmd keppni

Keppnisritari

1. Er tengiliður við þátttakendur og milli skipuleggjanda keppni og dómnefndar
2. Svarar spurningum sem berast varðandi keppnina, gerir dómnefnd viðvart og sér til þess að þær ásamt svörum við þeim verði aðgengilegar öðrum hugsanlegum þátttakendum
3. Skráir öll innsend verk eftir komudegi og tíma
4. Kannar hvort verkin uppfylli þau skilyrði sem tilgreind voru í boði til keppni
5. Upplýsir dómnefndina um það sem máli skiptir fyrir mat hennar
6. Endursendir verkin að keppni lokinni og upplýsinr verðlaunahafa

Framkvæmd keppni

Verklýsing

Verkefnið | verður að vera vel skilgreint skriflega með tilliti til markmiðs og innihalds. Tæknilegar kröfur verða að vera nákvæmlega tilgreindar. Þessar forsendur eiga að vera bindandi fyrir dómnefnd þegar hún dæmir verkið.

Réttur til þátttöku | í boði til keppni skal tekið skýrt fram til hvaða hóps keppnin nær.

Nafnleynd | allar tillögur sem sendar eru í keppni skulu vera nafnlausar. Tillagan á að vera merkt með einkunnarorði eða númeri og henni skal fylgja seðill með nafni í lokuðu umslagi. Umslagið skal merkt sama



einkunnarorði eða númeri og tillagan. Ekki má greina frá réttu nafni verðlaunahafa fyrr en ákvörðun dómnefndar hefur verið færð til bókar.

Skilafrestur | skipuleggjandi keppni stuðlar best að eigin markmiðum með því að hafa rúman skilafrest. Skilafrestur fer eftir eðli keppinnar en amk þrjú mánuðir og ekki minna en tveir. Afhendingarstað (heimilisfang), dagsetningu og tíma skal tilgreina nákvæmlega.

Verk sem ekki verða dæmd | tillaga sem berst ekki innan tilgreinds skilafrests eða uppfyllir ekki önnur tilgreind skilyrði, skal útilokuð frá dómi dómnefndar.

Verk sem ekki hljóta verðlaun | verk sem ekki hljóta verðlaun á að endursenda þátttakendum þeim að kostnaðarlausu innan tveggja mánaða frá því að keppni, eða hugsanlega sýningu, lýkur. Nema annað sé tilgreint í keppnislýsingu.

Tryggingar | skipuleggjandi keppni ber ábyrgð á að tryggja innsendar tillögur í keppnina gegn tjóni, þjófnaði eða bruna, frá því að framlagi er skilað til keppinnar og þar til það er endursent. Nema annað sé tilgreint keppnislýsingu.

Kynning

Kynna þarf keppnina vel fyrir öllum þeim sem boðið er til þátttöku.

Hönnunarmiðstöð sér um kynningar gagnvart hönnuðum en ef keppnin er opin öllum verður skipuleggjandi keppni að standa straum af kostnaði við frekari kynningu.

Dómnefnd

1. Meirihluti dómnefndarmanna skulu vera starfandi hönnuðir tilnefndir af Hönnunarmiðstöð.

Nafngreina þarf alla dómnefndarmenn þegar boðið er til keppni.

2. Dómnefnd velur sér formann

3. Öll innsend verk á að leggja fyrir dómnefnd sem ákveður hvort eitthvert þeirra verði vegna formgalla ekki dæmt.

3. Enga ákvörðun er hægt að taka nema dómnefnd sé fullskipuð.

4. Dómnefndin á að færa til bókar rökstuðning fyrir verðlaunaveitingu

Verðlaun

1. Skulu nema hærri upphæð en venjuleg þóknun fyrir sambærilegt verk á almennum markaði.

2. Verðlaunaupphæð og tilhögun verðlauna skal koma fram í keppnislýsingu, hvort um er að ræða ein verðlaun eða fleiri.

3. Dómnefnd getur ákveðið að breyta auglýstri tilhögun verðlauna telji hún sérstaka ástæðu til. Þ.e. hvort hún veitir ein verðlaun eða deilir þeim á fleiri en einn keppanda.

4. Verðlaunaféð er greiðsla fyrir hugmynd eða innsenda tillögu, greiða þarf fyrir frekari úrvinnslu verkefnisins. Þóknunin er ákveðin með tilliti til umfangs vinnunnar og not hönnunarinnar.

5. Veita skal öll verðlaun sem tilgreind eru í boði til keppni, nema þær tillögur sem borist hafa uppfylli ekki gæðakröfur að mati dómnefndar.

6. Keppnisritari tilkynnir öllum þátttakendum um nöfn verðlaunahafa

7. Verðlaun og hugsanleg þóknun vegna kaupa á verkum eiga undir venjulegum kringumstæðum að hafa verið greiddar í síðasta lagi tveimur mánuðum eftir að dómnefnd hefur kveðið upp úrskurð sinn.

8. Ef skipuleggjandi keppni hefur ekki nýtt sér verðlaunatillögu ári eftir að keppni hefur farið fram er hönnuði frjálst að nýta hana að vild.



Sýning

1. tilgreina skal í upphafi hvort standi til að halda sýningu á keppnistillögum.
2. Þegar keppnistillögur eru hafðar til sýnis, eiga þeir þátttakendur sem ekki hafa hlotið verðlaun rétt á að draga tillögur sínar til baka nema annað sé tilgreint í keppnislýsingu.

Úrvinnsla keppnistillögu

Óski verkkaupi eftir því að fá unnið úr tillögu, hvort sem hún hefur hlotið verðlaun eða ekki, skal verkið falið upphaflegum hönnuði. Fyrir það skal greiða sérstaklega í samræmi við gildandi markaðsverð í hverju einstöku tilviki. Ef um er að ræða hlut sem á að selja á almennum markaði þarf að semja um hlut til hönnuðar, einnig birtingarétt og annað sem við á í hverju tilfelli fyrir sig.

Viðbótarleiðbeiningar um lokaða keppni

Reglur og leiðbeiningar sem gilda um opna keppni, gilda einnig um lokaða keppni, með eftirfarandi viðbótum:

1. Öllum þátttakendum sem þegið hafa boð til keppni og afhent verk sitt á réttum tíma, skal greiða jafnháa þóknun. Hún skal vera amk. jafnhá því sem tíðkast að greiða fyrir sambærilegt verkefni. Einnig skal veita verðlaun.
2. Boði til keppni skulu fylgja nöfn allra þeirra hönnuða sem taka þátt í henni.